

RIJEČ UREDNIKA

Poštovani čitaoci, iznimno smo obradovani prilikom da vašoj čitalačkoj pažnji poklonimo *Kapiju VI*, novi broj godišnjaka Behram-begove medrese u Tuzli. Njegova posebnost je u tome što je nastajao u periodu kada se cijeli svijet susreo sa iskušenjem pandemije korona virusa, koji je ostavio vidne tragove na sve segmente društvenog života, pa i na obrazovanje. Usljed pojave pandemije korona virusa školska 2019/20. godina bila je posebna u odnosu na prethodne školske godine. Od 13. marta 2020. godine u osnovnim i srednjim školama na području Tuzlanskog kantona realizirana je online-nastava preko Google Classrooma ili neke druge platforme. Većina planiranih aktivnosti i takmičenja nisu realizirani. U prvom polugodištu realizirana su takmičenja na nivou Rijasetu Islamske zajednice u Bosni i Hercegovini iz predmeta: Bosanski jezik, Arapski jezik i Engleski jezik. Takmičenja koja su bila planirana od strane Pedagoškog zavoda TK nisu realizirana. Zbog navedenih okolnosti Pedagoški zavod Tuzlanskog kantona nije proveo ni vrednovanje osnovnih i srednjih škola za školsku 2019/20. godinu. I pored svega toga, školska godina je privedena kraju bez većih poteškoća, a profesori i učenici Behram-begove medrese stekli su nova iskustva u realizaciji e-nastave.

U prethodnih pet brojeva *Kapije* radove su objavljivali naši ugledni alimi, profesori Behram-begove medrese, univerzitetski profesori itd. U *Kapiji VI* vašoj čitalačkoj pažnji donosimo radove iz sljedećih znanstvenih oblasti: teologije, islamskog prava, islamske etike, psihologije, pedagogije, sociologije, književnosti, biologije, fizike... Pored autorskih radova, godišnjak sadrži najznačajnije projekte i aktivnosti koji su realizirani u 2019/2020. godini. Nadamo se da ćete se okoristiti čitajući navedene tekstove i informacije.

U ovom uvodniku ističem da mi je povjereni emanet urednika *Kapije* u prethodnih šest godina predstavljao čast i zadovoljstvo. Priredili smo šest brojeva *Kapije*, u kojima su sadržane informacije o projektima, aktivnostima i uspjesima, koji tako zabilježeni ostaju kao svjedočanstvo pregalaštva jedne generacije ljudi koji su se trudili na promicanju islamskog odgoja i obrazovanja i svega onoga što pokriva semantika riječi dobro.

Urednik